

Na osnovu člana 7. tačka 6. Zakona o vanjskotrgovinskoj politici Bosne i Hercegovine ("Službeni glasnik BiH", broj 7/98) i člana 14. Zakona o Vijeću ministara Bosne i Hercegovine i ministarstvima Bosne i Hercegovine ("Službeni glasnik BiH", broj 11/00), Vijeće ministara Bosne i Hercegovine na 66. sjednici održanoj 16. maja 2002. godine, donijelo je

## **ODLUKU**

### **O ZABRANI UVOZA U BOSNU I HERCEGOVINU I PROVOZA PREKO PODRUČJA BOSNE I HERCEGOVINE ŽIVIH DOMAĆIH I DIVLJIH SVINJA I PROIZVODA OD SVINJA PORIJEKLOM IZ FRANCUSKE DISTRIKT BASSE-RENDGEN**

**( "Službeni glasnik BiH", broj 12 od 06. 06. 2002. godine )**

#### I

1. Zabranjuje se uvoz u Bosnu i Hercegovinu i provoz preko područja Bosne i Hercegovine:
  - a) živih domaćih i divljih svinja;
  - b) sjemena od domaćih i divljih svinja;
  - c) embrija/jaja od domaćih i divljih svinja;
  - d) svježeg mesa domaćih i divljih svinja;
  - e) proizvoda od mesa domaćih i divljih svinja koji nisu bili obrađeni na način da je sa sigurnošću uništen virus klasične kuge svinja;
  - f) proizvoda životinjskog porijekla (od svinja) namijenjenih ishrani životinja ili za poljoprivrednu ili industrijsku upotrebu koji nisu bili obrađeni na način da je sa sigurnošću uništen virus klasične kuge svinja;
  - g) proizvoda životinjskog porijekla (od svinja) namijenjenih farmaceutskoj ili medicinskoj (hirurškoj) upotrebi koji nisu bili obrađeni na način da je sa sigurnošću uništen virus klasične kuge svinja;
  - h) patološki materijal i biološki proizvodi koji nisu bili obrađeni na način da je sa sigurnošću uništen virus kuge svinja, porijeklom iz Francuske distrikt Basse-Rendgen, radi sprečavanja unošenja u Bosnu i Hercegovinu zarazne bolesti klasične kuge svinja.
2. Zabrana iz stava 1. odnosi se i na pošiljke živih svinja koje potječu iz drugih zemalja ako se provoze preko područja Francuske distrikt Basse-Rendgen.

#### II

1. Zabrana iz tačke I. ne primjenjuje se na pošiljke:
  - a) hermetički zatvorene toplinski obrađene konzerve mesa, koje su tokom proizvodnje bile podvrgnute obradi sa Fo vrijednosti 3 i više, odnosno trajne konzerve;
  - b) sirove kože ukoliko su bile obrađene na jedan od sljedećih načina:

- tretirane kalcijevom lužinom na pH vrijednosti 12 do 13 najmanje 8 do 10 sati, te nakon toga tretirane kiselinom na pH vrijednosti 1 do 3 najmanje 6 do 10 sati;
- soljene morskom soli uz dodatak 2% kalcinirane sode najmanje 7 dana, ako su tako obrađene kože bile skladištene najmanje 30 dana prije utovarivanja u mjestu porijekla;
- sušene 42 dana na temperaturi od 20°C;

gdje način obrade mora biti naznačen na veterinarsko-zdravstvenoj svjedodžbi,

- c) toplinski obrađena tehnička mast i želatina gdje je za vrijeme obrade postignuta temperatura u središtu proizvoda od najmanje 70° C;
- d) hemijski potpuno obrađeni proizvodi kao što je wet-blue koža, hromirana koža, kuhane čekinje i slično;
- e) crijeva koja se uvoze u mliječnoj kiselini ili salamuri pH vrijednosti od 6,0 i niže;
- f) trofeji divljih životinja kuhani u kipućoj vodi dovoljno vremena da su otklonjena sva tkiva osim kosti, papaka i zuba,
- g) trajni suhomesnati proizvodi ukoliko udovoljavaju sljedećim uvjetima: aktivnost vode od 0,93 ili manje, pH vrijednost manja od 6, vrijeme zrenja najmanje 9 mjeseci i težina najmanje 5,5 kg.

### III

Ova odluka stupa na snagu danom donošenja, a objavit će se u "Službenom glasniku BiH" i službenim glasilima entiteta i Brčko Distrikta Bosne i Hercegovine.

VM broj 70/02  
16. maja 2002. godine  
Sarajevo

Predsjedavajući  
Vijeća ministara BiH  
dr. **Dragan Mikerević**, s. r.